

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jenahán ndasí, te yósó núū tútu iī jeē ní catee tēe ni canacani jnūhun ya. ³ Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chīji yucūn rey David. ⁴ Te ni natecu yā mēhñu ndíyí ní sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu tácá nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jēe coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo siī ni rō.

Jeē cuní Pablo quihñ de ñuu Roma

⁸ Te xīhna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyívi jité

núu jnūhun cuahān ndese vāha cá candíje ró yá. ⁹ Te máá Yaā Dios jiní yā jeē niní jícán tahu rī jehē rō jijnáhan ró nuū jicán tahu rī. Chi yōhyo ndíhví ni rī jejnínū ri nuū yā jeē nácani ri jnūhun Sēhe ya. ¹⁰ Te niní jícán tahu rī nuū yā jeē núu cúni yā te nde vijna te cuu jecondēhe rí rohó. ¹¹ Chi cúu ni rī coto ri nuū rō jijnáhan ró, te stéén gā rī jnūhun ya nuū rō, návāha quendōo vāha ga anuá rō te cuiñi nīhin ga rō jín. ¹² Súcuan cúni rī návāha sáha yó jéē inuú coo ndeyí ni yō jijnáhan yó síquī jeē inuú cá candíje yó yá.

¹³ Hermano jijnáhan ró, cúni rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cúni rī scuité núu ga rī jnūhun ya mēhñu ró, nájñūhun ni sáha ri mēhñu ñáyuu tāca gá nación. ¹⁴ Chi cúu ri tēe táu síquī jnūhun ya, chi táu rī nacuāha ri jnūhun ya nuū ndíhi ñáyuu, cúu ñáyuu jiní gā síquī ndíhi jeē iyó ñáyiví jín jéē tu jíní cuiñi, cúu ñáyuu tūhva jín jéē tú tūhva. ¹⁵ Jeē yúcuan cúu jeē ndíhví ni rī jeē suni nuū rohó ñáyuu ñuu Roma nacani ri jnūhun jnáma ya yohó.

Jeē ndíso jnūhun vāha ya poder

¹⁶ Chi tu cúcanu rī síquī jnúhun vāha ya, chi yúcuan cúu poder Yaā Dios jeē jnáma ya tāca ñáyuu cá candíje, xīhna gā ñáyuu hebreo te suni tāca gá ñáyuu. ¹⁷ Chi jnūhun vāha ya un stéén nuū yō jeē ndáhva Yaā Dios cuēchi yó síquī jeē candíje yó jéē sáha ya jehē yō, te máá jéē candíje yó ní cuáhān yō. Chi súcuan cáhán nuū tútu iī: Ñáyuu jeē ní ndahva yā cuēchi i, técu i jeē candíje i jeē sáha ya jehē i, áchí.

Síquī jeē iyó ndasí cuéchi ñáyuu

18 Chi jíní vāha yó jéē Yaā Dios andiví, cuāha ya castigo xeēn nuū tāca ñáyuu tu cá candíje te máni cuēchi cásáha. Chi jín jniñu néé cásáha i te cájesi i nuū jnúhun ndaā. 19 Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. 20 Chi jín táca jeē ni sáha ya te cúu jécūhun ni ñayuu ndese Yaā cúu máá Yaā tu jító i nuū. Chi nde ni jecōo ñayiví jín ndé vijna te cúu jécūhun vāha ni i jeē maá yá cúu Yaā Dios te íyó poder yā ní cáni. Te jeē yúcuan má cúu cuiti cahān i jeē tu jíní i jeē iyó yá. 21 Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé íi, te ni quendōo nee ini anuá i. 22 Cácahān i jeē ndichí i, te sa suhva cá cunéé i. 23 Chi ni castóo i Yaā Dios jeē yóhyo luu cújéhnú, jeē ma cúu cuiti. Te ni cajetáhú i tācá imagen jeē casáha i, jeē cáa nájnūhun tēe cájihī, te suni nde imagen saa jín cóo jín quití cájica ndicúún ndaha.

24 Te jeē yúcuan ní siaá Yaā Dios i jeē na sáha i tācá jniñu jnéhén jniñu néé jéē cuní i. Te cásáha i jniñu néé jín jnáhan i jeē cúu máá jnúhun canu. 25 Chi tu ní cá candíje i jnúhun ndaā Yaā Dios, chi sa ni cacandíje i jnúhun stáhú. Te cáhīyo yíñúhún i te cáchiñúhún i nuū tāca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cujéhnú ya ní cáni. Amén.

26 Jeē yúcuan ní siaá Yaā Dios i jeē na sáha i tācá jniñu néé jéē cándiyo ni i jeē cúu máá jnúhun canu. Chi nde ñahan ni casama ña modo síhí, te ni quiví ña jín modo neé. 27 Te suni súcuan tēe ni casiáá de

modo chíjniñu jíin ñahan. Te nde ni nduquĩjí de ni casáha ndĩyĩ de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo siquĩ jniñu néé ní casáha de.

²⁸ Te jeē tu ní cáconi i cuajnúhún i Yaā Dios, jeē yúcuán ní siaá yā i jeē na cáni néé ni i, te sáha i tēcá jniñu jeē tu íyó váha. ²⁹ Te máni máá na jniñu jeē tu íyó ndáā cándihvĩ ni, te cájica jnéni, casáha jniñu néé, cándiyo ni, cájito uhũ jnáhan. Te máni jeē cácuésún ni, cájehni ndĩyĩ, cájejnáhan, cástáhú, casáhuhũ jnáhan, casájnúhún siquĩ jnáhan. ³⁰ Cácahān jnúhun néé síquĩ jnáhan, cájito uhũ Yaā Dios, cácujeē ni, casándúxí máá, casátéyĩ máá, cájequin costumbre neé, tu cájendetũ nuũ tatá nuũ naná. ³¹ Te tu cájecũhun cuĩti ni, tu squĩcu jnúhun jéjnúhun, tu íyó máni jíin jnáhan, tu íne cáhnu ni nuũ jnáhan, tu cúndáhú ni jnáhan. ³² Te je cájini váha i jeē ni sándaā Yaā Dios jeē ñáyuu casáha súcuán, cánuú jnahnũ ndetũ i. Te vēsú súcuán cájini i, te níni casáha i jniñu néé un, te suni cánujnahan ni i jeē casáha jnáhan i súcuán.

Ndaā sándaā Yaā Dios siquĩ cuéchi

2

¹ Núu súcuán te róhó jéē cahán cuéchi siquĩ jnáhan, núu na-ni ñáyuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi siquĩ jnáhan ró cúu jeē ndénehen ró cuéchi siquĩ maá ró. Chi róhó jéē cahán cuéchi, suni súcuán sáha máá ró cuéchi. ² Chi jíni yō jeē Yaā Dios, ndaā sáha ya jeē ndónnda ya siquĩ cuéchi ñáyuu casáha súcuán. ³ Te róhó jéē cahán cuéchi siquĩ ñáyuu casáha cuéchi,

te suni súcuan sáha máá ró, ¿te á jéni ni rō jeē cácu máá ró quivī ndóna Yaā Dios siquī cuéchi, chí naún? ⁴ ¿A cújéé ni rō nuū jnúhun jeē yóhyo vāha ni Yaā Dios jíin ró, jíin jéé iyó paciencia yā jeē tú yachī cuāha ya castigo nuū rō? ¿Te á tu jécūhun ni rō jeē jnúhun jeē yóhyo vāha ni yā sáha jeē nácani ni rō siquī cuéchi ró? ⁵ Chi nīhni ni rō te tu nácani ni rō siquī cuéchi ró. Te jeē yúcuan cáyā gā rō castigo siquī rō quivī sáha Yaā Dios juicio, máá quivī jeē cóo ndijin jeē ndaā sándaā yā siquī cuéchi. ⁶ Chi chunaa yā nuū ná ñn ná ñn ñayuu núu ndese jniñu ni casáha i. ⁷ Te ñayuu jeē tu jécuiñī i jeē sáha i jniñu váha, cuāha ya jnúhun jeē cótecu i ní cáni. Chi ndúcú i quivī i nuū ndujéhnu yíñúhún i, nuū ní cáni cotecu i. ⁸ Te quitī ni yā te cuāha ya castigo nuū ñáyuu kujéé ni nuū yā, te cúnīhni ni nuū jnúhun ndaā, chí sa nuū jnúhun yacuá yóho jetáhú i. ⁹ Te tāca ñáyuu casáha jniñu néé, chí nihīn i jnúndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tāca gá nación. ¹⁰ Te sa suhva tāca ñáyuu casáha jniñu váha, chí quivī i nuū ndujéhnu yíñúhún i, te coo ndeyí coo sī ni i, xīhna gā ñayuu hebreo te suni súcuan ñayuu tāca gá nación.

¹¹ Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jíin i. ¹² Chi tāca ñáyuu jeē casáha cuéchi, vésú tu cáyihī i chíji ley jeē ni jéhe ya nuū Moisés, te tu níni ley un te jnahnū ndetū i. Te tāca ñáyuu cáyihī chíji ley Moisés te casáha cuéchi, jíin ley un sándaā yā cuéchi i. ¹³ Chi tu ndáhva Yaā Dios cuéchi ñayuu jeē maá jéé cúni nahín-ni i jnúhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuéchi i. ¹⁴ Chi ñayuu tācá

nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵ Te súcuan cástéén i jeē jnúhun ndácu ley un chi ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i siquī núu ni sáha i cuēchi chí váha ni sáha i. ¹⁶ Te súcuan coo máá quíví jeē jíin Jesucristo sándaā Yaā Dios siquī tāca jéē tu íyó váha jeē ní cajeni sáhi ni tāca ñáyuu. Súcuan cáhán jnúhun vāha ya jeē nácani ri.

Siquī jeē tu cásquícu ñáyuu hebreo ley Moisés

¹⁷ Te róhó cácahān rō jeē téē hebreo cácuu ró, te cátenuū rō maá ley Moisés, te cácutéyí ró jeē siquí Yaā Dios. ¹⁸ Te cájeni ni rō jeē jiní rō ndese nújnahan ni yā, jíin jéē cúu nácāji vāha ró ndé-ni cúu jniñu vāha, chi ni cacutūhva ró ley un. ¹⁹ Te cájeni ni rō jeē maá ró cácuu tēē steén ichi Yaā Dios nuū ñáyuu tu cájini cuiti, jíin jéē cúu sáha ró jéē cúndijin ini anuá ñáyuu cájica nájnūhun nuū néē. ²⁰ Te cájeni ni rō jeē cúu steén rō nuū ñáyuu tú tūhva jnúhun ya, jíin jéē maá ró cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jnúhun ndíchí jnúhun ndaā, cájeni ni rō. ²¹ Núu súcuan te máá ró jeē castéén nuū ñáyuu, ¿te naun tu cástéén rō nuū maá ró? Te máá ró jeē cácahān jeē ma sácúíhná i, ¿te naun cásácúíhná máá ró? ²² Te máá ró jeē cácahān jeē ma cósiquí ndéē i, ¿te naun cásíquí ndéē maá ró? Te máá ró jeē cácahān jeē cácuquini ni rō ídolo, ¿te naun cásácúíhná ró ndajníñu jeē yúcu ini vehe ídolo? ²³ Te cácutéyí ró jíin ley Yaā Dios, te vēsú súcuan te cásáha ró jéē cácahān ñáyuu siquī yā, chi tu cásquícu máá ró jnúhun ndácu ley yā ún. ²⁴ Chi

súcuan yósó núu tútu iī: Ñayuu tāca gá nación, máni cácahān ndevāha i siquī Yaā Dios, jeē siquí cuéchi róhó ñáyuu hebreo.

²⁵ Te núu cásquícu ró ley Moisés, yūcuán na te níhín jníñu ndije jeē ní canihīn rō jnunī circuncidar. Te núu tu cásquícu ró ley un, te vēsú ni cuu ró circuncidar, te nájnūhun jeē tu ní cúu ró. ²⁶ Te tēe tācá nación, núu cásquícu de jniñu ndácu ley un, vēsú tu ní cánihīn de jnunī circuncidar, núu súcuan te nájnūhun ni canihīn de jnunī circuncidar. ²⁷ Te tēe jeē tu ní cúu circuncidar yiqui cúñu de, te cásquícu de ley yā, máá de cahān cuéchi siquí rō. Chi tu cásquícu ró, vēsú cánevāha ró tutu ley un, te ni cuu ró circuncidar. ²⁸ Chi nasūu jéē cáa ichi síquí ñn tēe sáha jeē cúu ndije de tēe hebreo. Te ni nasūu jéē cúu circuncidar yiqui cúñu ñn tēe sáha jeē cúu de tēe ndaā. ²⁹ Chi sa suhva tēe cúu hebreo ndije, cúu jeē ini anuá de ñúhun jnūhun ndaā. Te tēe cúu circuncidar ndije, chi nde jíin ini jíin ánuá de sáha de jniñu ndaā te nasūu jéē ndíso de jnunī circuncidar jeē cahán ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

3

¹ ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé níhín jníñu jeē casáha i circuncidar? ² Vāha ndasí níhín jníñu. Xīhna gā nihín jníñu jeē ni jéhe Yaā Dios jnūhun ya nuū máá i. ³ Te vēsú sava i tu ní cá candíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún? ⁴ Tú cuiti jeē súcuan, chi vēsú núu ndihī ñayuu castáhú i, te Yaā Dios chi íyó ndáā yā.

Chi suhva yósó nuū tútu ìi jeē ni cáhān ìn tēe jíin yá:

Cahān ñayuu jeē iyó ndáā ni jíin táca jnúhun cáhān ni,

te cuni i jeē iyó ndáā ní vēsú núu cácahān i siquī ní. Achí tutu.

⁵ Te cácahān sava ñayuu jeē iyó váha jeē sáha yó cuēchi, chi cuēchi yó jéjníñu stéén jeē iyó ndáā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájnūhun cácahān ñayuu ñayīví.) ⁶ Tú cuiṭi jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuēchi ñayuu ñayīví?

⁷ Te núu jnúhun stáhú cácahān ñayuu jéjníñu stéén jeē yóhoyo cújéhu Yaā Dios siquī jeē máni cáhān ndaā yā, ¿te á cuu cahān yō jeē tú vāha jeē cahān yā jeē cuēchi cúu jeē castáhú i? ⁸ Tuú, chi núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núú. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chi íyó váha jeē ndénehen ya cuēchi siquī i.

Ndivii yō iyó cuēchi

⁹ Núu súcuan ¿te á váha ga ñayuu cácuu yóhó ñáyuu hebreo vēsú inga ñayuu naún? Tú cuiṭi jeē súcuan. Chi je ni cacahān yō jeē vēsú ñayuu hebreo chí ñáyuu tāca gá nación, ndivii yō yíhi chíji cuēchi.

¹⁰ Chi suhva cáhān tutu ìi:

Tú cuiṭi na ñayuu ndaā iyó, ni ìn i.

¹¹ Te tú cuiṭi ñayuu jécūhun ni iyó, te tú ni ìn i nánducú i Yaā Dios.

- 12 Ndihi i ni cascuíta i jnūhun ya,
 te inuú-ni ni castívi ndihi i máá i.
 Te tú cuíti ñayuu sáha jniñu váha íyó, ni in i.
- 13 Yaū sucūn i cúu nájnūhun yaū ndīyi jeē núne,
 chi máni jnūhun stáhú cácahān i.
 Te nájnūhun veneno coō yīhi yuhu i,
- 14 chi máni máá jnúhun ndevāha jnūhun uvuā
 cácahān i.
- 15 Te yōhyo ñama jehē i jeē cáhni i ndīyi.
- 16 Te ndé-ni cúu-ni nuū cájica i te squívi i jnūndóho
 jeē jnahnú ndetū ñayuu.
- 17 Te tu cájica cuíti i jíin jnúhun coyūcu mánī i,
 18 te ni tu cánacani ni i jeē cónso íyo i nuū Yaā Dios.
 Achí tutu.
- 19 Te jíiní yō jeē tāca jnúhun cáhán ley jenahán, chi
 cáhán nuū ñayuu yīhi chíji ley un, návāha ndihi i ma
 cúu cahān i jehē i. Chi ndenehen Yaā Dios cuēchi
 síquī i nde jíin ñayuu ní ñáyīví. 20 Chi tú ni in ñayuu
 quendōo ndaā i nuū yā jeē nducú i squícu i jniñu
 ndácu ley un. Chi ley un jéjníñu máni návāha cuni
 yō jeē iyó cuéchi yó.

*Jeē jnáma ya yohó síquī jeē candíje yó jéē sáha ya
 jehē yō*

- 21 Te vijna te je cájini vāha yó ndese ndáhva Yaā
 Dios cuēchi yó. Te nasūu ley un sáha jeē quéndōo
 ndaā yō, vésú maá tutu ley jíin téé ni cánacani
 jnūhun ya, ni cacahān ndese ndáhva yā cuēchi
 ñayuu. 22 Chi tāca ñayuu jeē cácaandíje i jeē ni jíin
 Jesucristo jeē chúnaa yā cuēchi i, chi ndahva Yaā
 Dios cuēchi i síquī jeē súcuan cácaandíje i. Chi inuú-ni
 cúu táca ndihi ñayuu. 23 Chi ndihi yó ni casáha
 cuēchi, te jeē yúcuan tu ní cúu quendōo ndaā yō nuū

Yaā Dios. ²⁴ Te siquī jeē yóhyo vāha ni Yaā Dios, jeē yúcuān ndáhva yā cuēchi yó súcuān-ni. Chi siquī jeē ni jíhī Cristo Jesús cúu jeē jnáma ya yohó. ²⁵ Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhī yā. Te jnáma ya yohó núu súcuān cándíje yó. Te súcuān ni sáha Yaā Dios návāha stéén yā jeē Yaā ndaā cúu ya. Chi ichi yátá ni ĩyo paciencia yā, te tu ní chíhi ya cuenta cuēchi ñayuu. ²⁶ Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vēsú íyó cuéchi i, chi cáncandíje i jeē ní chunaa Jesús cuēchi i ni ndahva yā.

²⁷ Núu súcuān ¿te á cuu cutéyí gá yō siquī maá yó? Ma cúu cuiti, chi ma cúu cutéyí yó caní ni yō jeē vāha squícu yó ley yā. Chi jnáma ya yohó máá síquī jeē candíje yó jéē sáha ya jehē yō. ²⁸ Núu súcuān te je jíni yō jeē ndáhva Yaā Dios cuēchi yó síquī jeē súcuān cándíje yó, te nasūu jéē nducú yó squícu yó jéē ndácu ley.

²⁹ ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. ³⁰ Chi ĩn-ni Yaā Dios iyó, te ndáhva yā cuēchi ñayuu cáncandíje jeē ni sáha ya jehē i, cúu ñayuu ndíso jnuni circuncidar, cúu ñayuu jeē tuú. ³¹ Te jeē candíje yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

Abraham cúu ĩn ejemplo nuū yō

4

¹ Núu súcuān ¿te ndese cahān yō siquī tāca jéē ní

cuu jíin jí yō Abraham? ¿Ndese ni ndahvā cuēchi de? ² Nasūu jēē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núú, te cuu cutéyí de jeē váha ni sáha de. Te tu ní cutéyí de, chi nasūu síquī jeē ni sáha máá de cúu jeē ní ndahva Yaā Dios cuēchi de. ³ ¿Chi ndese cáhán tutu íi? Cáhán jeē ní candíje Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de. ⁴ Te ñin ñayuu sájniñu, te yāhu i chi nasūu jēē cútahū i cúu, chi jeē chúnaa yō nuū i cúu. ⁵ Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuéchi i, yūcuán na te ndahva yā cuēchi i. ⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñin jniñu jeē quéndōo ndaā i nuū yā. ⁷ Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i,

te tu ndénehen ya cuēchi síquī i.

⁸ Te nacā ndetū tēe jeē tuá chíhi máá Jítóho yō cuenta cuēchi de.

Achí tutu.

⁹ ¿Te á máni máá ñáyuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jēē jé ni cuu de circuncidar, chi nde ná tuú. ¹¹ Te cuéé gá te ni nihīn de jnuni circuncidar. Te suu ni cuu ñin seña, nájñūhun ñin

sello jeē ní ndahva yā cuēchi de síquī jeē súcuan ni candíje de. Te jeē yúcuan ní cahān yā jeē cuu de jíí nuū tāca ñáyuu jeē candíje i jeē sáha ya jehē i, suni nuū ñáyuu tu ní cúu circuncidar, chi suni ndahva yā cuēchi máá i. ¹² Te suni cúu de jíí nuū ñáyuu ní cuu circuncidar, te nasūu máni jeē ní cuu i circuncidar, chi suni jeē ní jñi i ejemplo de. Chi cá candíje i jeē sáha ya jehē i, nájñuhun ni candíje máá de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chi sa suhva síquī jeē ní candíje de jeē ni jéjnūhun ya, te ni ndahva yā cuēchi de. ¹⁴ Chi núu jeē máni máá ñáyuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó nuú, te ma nihín jñiñu jeē ni jéjnūhun ya ún. ¹⁵ Te ley chi sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jñuhun stíví ñayuu síquī ley coo núu.

¹⁶ Núu súcuan te ni jejnūhun ya jeē sáha ya jeē váha jíin ñáyuu síquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñáyuu cá candíje nájñuhun ni candíje Abraham. Te súcuan cúu de jíí nuū tāca yó jeē cá candíje yó. ¹⁷ Súcuan ni sáha Yaā Dios chi ni candíje de jeē sáha ya. Chi súcuan cáhán tutu i: Ni jeni ri rohó cuu ró jíí nuū cuehē ndasí ñáyuu.

Súcuan ni cahān maá Yaā jeē nastécu ndīyī te cáhán yā ndese coo tāca jéē ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núú. Te jeē yúcuan ní nduu de jíí nuū cuehē ndasí ñáyuu, nájñūhun ni cahān Yaā Dios: Súcuan nducuehē yucūn rō, achí yá jíín de.

¹⁹ Te je yajni jinū de ciento cuiyā, te vēsú súcuan te tu ní quénda de nuū jñūhun cándíje de, vēsú jiní de jeē maá de jíín ñasihí de Sara je jéhnū ndasí ndíndúú de jeē ma cúu ga coo sēhe de. ²⁰ Te tu ní nácani síquī ni de jeē ma cándíje ga de jñūhun ní jejnūhun Yaā Dios jeē coo sēhe de. Chi sa suhva ni candíje níhin ga de, te ni nacuatáhú de nuū Yaā Dios. ²¹ Chi ni cucáhnu vāha ni de jeē cúu squícu Yaā Dios ndihī jeē ni jéjnūhun ya. ²² Te jeē yúcuan ní ndahva yā cuēchi de síquī jeē súcuan ni candíje de.

²³ Te nasūu máá-ni síquī Abraham cúu jeē yosó núú tútu jeē ní ndahva yā cuēchi de jeē ní candíje de. ²⁴ Chi suni yósó jéē síquī yohó jíjnáhan yó. Chi suni ndáhva yā cuēchi máá yó jéē candíje yó jéē cúu ya Yaā ní nastécu Jitoho yō Jesús. ²⁵ Chi ni jihī Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuan te je ni ndahva Yaā Dios cuēchi yó síquī jeē ní candíje yó jéē sáha ya jehē yō. Te jeē yúcuan ní sáha ya jeē ní ndīvī yó núu jñūhun manī yā jíín yó, síquī jeē ni jihī Jitoho yō Jesucristo jehē

yō. ² Chi máá Cristo ni sáha jeē ni quívicoo yó núū Yaā Dios, chi ni sáha ya jeē váha yóhó síquī jeē súcuan cándíje yó. Te cáhīn nīhin yó jíin jnúhun jeē sáha ya jeē váha yóhó. Te cúsī ni yō chi ñúhun ni yō jeē jinú yō nuū lúu cujéhnú yó jíin Yaā Dios. ³ Te nasūu máá yáha-ni, chi suni cúsī ni yō jeē ndóho yó jnúndóho. Chi jíiní yō jeē maá jnúndóho sáha jeē jéndeyí ni yō. ⁴ Te jeē jéndeyí ni yō sáha jeē íje váha yó cuu yó ñáyuu ndaā. Te jeē íje váha yó sáha jeē ñúhun ni yō tāca jéē váha jeē cóo. ⁵ Te tāca jéē ñúhun ni yō, chi nihīn nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuīti jnama yó máá yó, te ni jihī Cristo jehē yohó jéē cúu yó ñáyuu íyó cuéchi. Te ni jihī yā maá quívī jeē jé ni jeni Yaā Dios. ⁷ Te yí̄ cúu jeē cúū ñn ñayuu jehē inga ñayuu, vésú jehē ñn ñayuu ndaā. Chí sanaa te íyó jínu jeē chúndeyí ni ñn tēe cuu de jehē ñn tēe ndaā váha. ⁸ Te máá Cristo chi ni jihī yā jehē yō náa máni cuéchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuéchi yó síquī jeē ni jihī Cristo jehē yō. Núu súcuan te suni jíiní váha yó jéē jnama Cristo yohó núū castigo quiji quívī sáha Yaā Dios juicio. ¹⁰ Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndívī yó núū jnúhun manī yā jíin yó. Te jeē súcuan ní ndívī yó nuū jnúhun manī yā jíin yó, te suni jíiní váha yó jéē cācu yó síquī jeē técu Cristo, nduú yá jíin yó. ¹¹ Te nasūu máá yáha-ni, chi suni cúsī ndasí ni yō jíin Yaā Dios síquī jeē ni sáha Jítoho yō Jesucristo jehē yō, chi máá yá ni sáha jeē

ní ndīvī yó núū jnúhun manī Yaā Dios jín yó.

Jnúhun Adán jín jnúhun Cristo

¹² Núú súcuan te jíní yō jeē ni quívi cuēchi ini ñayīvī ní sáha máá ñn-ni tēe Adán. Te jeē síquī cuēchi yúcuan te ni jecōo cuehyī jéhni ñayuu. Te jeē yúcuan cúu jeē jihí ndīhi ñayuu, chi ndīhi i yīhi cuēchi. ¹³ Te nde ná tu cuāha ya ley nuū Moisés, te je íyó cuēchi ini ñayīvī. Te síquī jeē ná tu coo ley yā, te tu ní chíhi ya cuenta jeē castīvi i. ¹⁴ Te vēsú súcuan te nde tiempo Adán te nde tiempo Moisés ni yīhi ñayuu chíji cuehyī jeē jéhni i síquī jeē iyó cuēchi i. Chi ni jihí i síquī cuēchi ni casáha máá i, vēsú tu ní sáha i jnáhan cuēchi jeē ni sáha Adán jeē ní cunīhni ni de nuū ñn jniñu ní ndacu ya. Te Adán ni cuu de ñn muestra maá Yaā ní quiiji cuéé gá.

¹⁵ Te jnúhun jeē ni sáha Adán cuēchi, tu quíjnáhan cuíti jín táhū jeē jnáma Yaā Dios yohó. Chi jeē ni stīvī máá ñn-ni tēe ún, jeē yúcuan cúu jeē jihí ndīhi yó. Te jnúhun jeē jnáma Yaā Dios yohó cújéhnú ndasí gá, chi síquī jeē ni sáha máá ñn-ni tēe Jesucristo cúu jeē súcuan-ni jnáma ya ndīhi ñayuu candíje. ¹⁶ Te cuēchi jeē ni sáha máá ñn-ni Adán, tu quíjnáhan cuíti jín jnúhun jeē jnáma Yaā Dios yohó. Chí síquī máá ñn-ni cuēchi ún te ni quívicoo ñayuu chíji jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuēchi i, vēsú yōhyo cuehē cuēchi ni casáha i. ¹⁷ Chi síquī jeē ni sáha máá ñn-ni tēe Adán cuēchi, te ni nihīn poder cuehyī jéhni ñayuu. Te sa suhva síquī jeē ni jíhī maá ñn-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jín yá. Chi ni ndahva yā cuēchi i síquī jeē yóhyo vāha ni yā.

18 Núu súcuan te síquī jeē ni sáha máá ñn-ni tēe Adán cuēchi, te ni quívicoo ndihī ñayuu chíji jnūhun jnahnū ndetū i. Te sa suhva síquī jeē ni sáha máá ñn-ni tēe Jesucristo ñn jniñu váha ndasí, te ndáhva Yaā Dios cuēchi ndihī ñayuu te cotecu i ní cáni. 19 Chi síquī jeē tu ní jéndije máá ñn-ni tēe, te ni quívicoo cuehē ndasí ñayuu chíji cuēchi. Te suni súcuan síquī jeē ní jendije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

20 Te ni jēhe ya ley yā návāha cuni yō jeē cuēhē cuēchi cásaha yó. Te jeē ní nducuehē cuēchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō. 21 Núu súcuan te nájñūhun ni nihīn poder cuehyī jéhni ñayuu síquī jeē iyó cuéchi i, suni súcuan íyó poder jnūhun jeē váha ni yā jíin yó. Chi ndáhva yā cuēchi yó te cotecu yō ní cáni síquī jeē ni jíhī Jítoho yō Jesucristo jehē yō.

Jeē tuá yíhi yó chíji cuēchi chí yíhi yó ndaha Cristo

6

1 Núu súcuan ¿te ndese cahān yō? ¿A caca ga yō jíin cuéchi návāha víhyá gā sáha ya jeē váha yóhó jéē cóne cáhnu ni yā nuū yō? 2 Ma cúu cuítī. Chi nájñūhun je ni jíhī yō jeē tuá yíhi yó chíji cuēchi, te ma cúu ga caca yó jíin cuéchi núu súcuan. 3 ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jíhī yō jíin yá? 4 Chi jeē ní jendute yó cúu nájñūhun ni quindūji yó jéē ni jíhī yō jíin yá. Te vijna te cuu caca yó jíin vida jeé jeē ni jēhe ya nuū yō, chi nájñūhun suni ni

natecu yō jíin yá. Chi ni natecu yā ni sáha Tátá yā jíin poder jeē cujéhnú ndasí yá.

⁵ Chi núu ni cundúú yó jíin yá síquī jnúhun jeē ni jíhī yō jíin yá, te suni súcuan cundúú yó jíin yá síquī jnúhun jeē ní natecu yō jíin yá. ⁶ Chi jíiní yō jeē ní naa modo maá yó jeē ní jíca yó jíin ichi yátá, chi ni quíiví yó núu jnúhun jeē ni jíhī yō jíin Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajníñu yó núu táca jniñu jeē máni cuéchi cúu. ⁷ Chi ñayuu jeē jé ni cajihī, je ni quendacoo i chíji táca cuéchi. ⁸ Te núu je ni jíhī yō jíin Cristo, te cándíje yó jéē suni súcuan ni natecu yō jíin yá. ⁹ Chi jíiní yō jeē ní natecu Cristo, te ma cúu cuítí ga yā, chí cuehyí jéhní yóhó, tuá na vé cúu sáha jíin yá. ¹⁰ Chi jeē ni jíhī yā, te ñn jínu-ni ni jíhī yā jeē síquí cuéchi ñayuu. Te jeē técu yā vijna, chí sáha ya jeē cuní Yaā Dios. ¹¹ Te suni súcuan róhó jíjnáhan ró, sáha ró cuenta jeē nájnūhun ni cajihī ró jeē ní quendacoo ró chíji cuéchi. Te cátecu rō návāha sáha ró jéē cuní Yaā Dios, chí ndúú ró jíin Jítóho yō Cristo Jesús.

¹² Núu súcuan te ma cuáha ga rō jnūhun quíhi ró chíji cuéchi jíin yíquí cúñu rō jeē cúu. Chi cuéchi ún stíhví ni rohó jéē na sáha ró táca jéē ndíyo néé ni rō. ¹³ Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihī ró te ni canatecu rō nuū yā. Te cuāha ndíhi ró máá ró nuū yā jeē cuajníñu ró núu jniñu ndaā. ¹⁴ Chi tuá na poder cuéchi jeē cundeyí jíin ró, chí tuá cáyíhi ró chíji ley jenahán, chí sa cáyíhi ró chíji jnūhun jeē váha ni yā jíin ró.

Jnūhun mozo jeē steén ndese quéndōo ñayuu cácadíje

¹⁵ ¿Ndese sáha yó núu súcuan? ¿A caca ga yō jíin cuéchi siquī jeē tuá yíhi yó chíji ley jenahán, chí sa yíhi yó chíji jnūhun jeē váha ni yā jíin yó? Ma cúu cuíti. ¹⁶ Chí cájini rō jeē núu cuāha ró máá ró jeē cuatáhú ró sájniñu ró núū ñn tēe, núu súcuan te cácuu ró mozo nuū tée ún, te cánuú cuandije ró núū de. Te suni súcuan núu cuāha ró máá ró jeē sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. ¹⁷ Te na cútahū yō nuū Yaā Dios, chí vésú ni cacuu ró mozo nuū cuéchi, te vijna chí nde jíin ini jíin ánuá rō ni cajetáhú ró nuū jnúhun ya jeē ni quívicoo ró núū. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núū jniñu ndaā. ¹⁹ (Ni cahán rī ñn jnūhun ndese cúu siquī mozo ini ñayivi yáha, chí tu cájecūhun yachī ni rō siquī jnúhun ya.) Núu súcuan te nájnūhun ni cajēhe ró máá ró nde saá jeē ní cajejniñu ró núū tācá jniñu jnéhén jniñu néé, suni súcuan cuāha ró máá ró vijna jeē cuajniñu ró núū jniñu ndaā, návāha coo ndoo coo ñi rō nuū Yaā Dios.

²⁰ Chí nde náa cácuu ró mozo nuū cuéchi, te tu ní cájejniñu ró núū jniñu ndaā. ²¹ ¿Te na vé ni canihín rō siquī cuéchi ni casáha ró un jéē cácucanu rō vijna sáha? Tú cuíti, chí máá jéē jnahnú ndetū rō ní cáni sáha. ²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núū Yaā Dios. Te suu sáha jeē quéndōo vāha ró, chí cáhīyo ndoo cáhīyo ñi rō nuū yā, te nde sandihí te cotecu rō ní cáni. ²³ Chí yāhu jeē nihín ñayuu siquī cuéchi

cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cáni andiví, siquī jeē nduú yó jíin Jítóho yō Cristo Jesús.

Jnūhun ñasihí jíin yī jeē steén ndese quéndōo ñayuu cácandíje

7

¹ Hermano, je cájini rō ndese cáhán ley yā, te cájini rō jeē yīhi ñayuu chíji ley maá-ni núu técu i ñayiví yáha. ² Te yáha cúu nájnūhun in ñahan jeē ní quijnáhan, chi cáhán ley jeē yīhi ña ndaha yī ña maá-ni núu técu de. Te núu ni jihī yī ña, te je ni quenda ña chíji ley jeē ní quijnáhan ña jíin de. ³ Núu súcuan te núu quijnáhan ña jíin inga tēe níni técu gā yī ña, te casíquí ndéē ña de. Te núu je ni jihī yī ña, te je ni quenda ña chíji ley un. Te cuu quijnáhan ña jíin inga tēe, chi nasūu jéē casíquí ndéē ña núu súcuan.

⁴ Te suni súcuan róhó jíjnáhan ró, ñánī mánī, chi ndúú ró jíin Cristo. Chi nájnūhun ni cajihī rō jíin Cristo, te ni quendacoo ró chíji ley jenahán. Te vijna chi nájnūhun ni quijnáhan ró jíin inga, cúu jeē ní quivícoo ró ndaha Cristo, Yaā ni natecu mēhñu ndíyí, návāha cuu sáha ró jniñu váha jeē cuní Yaā Dios. ⁵ Chi ná ni cajica yó jíin modo maá yó nde saá, te ley un ní sáha jeē ní ndīyo néé ni yō tāca jéé cuní yiquí cúñu yō jeē sáha yó. Te yūcuan ní sáha jeē jnahnú ndetū yō nuú. ⁶ Te vijna te je ni quenda yó chíji ley jenahán, chi nájnūhun je ni jihī yō jeē ma nihín gā poder siquī yō. Te súcuan te íyó libre yō jeē cuajniñu yó núu Yaā Dios. Te jíca yó jíin modo jeé

jéē cuní maá Espíritu, chi tuá yáhi yó chíji ley jeē ní tee Moisés jengahán.

Siquī cuēchi jeē ñúhun ini anuá yō

⁷ ¿Ndese cahān yō núu súcuan? ¿A ley ndíso cuēchi? Tú cuíti jeē súcuan. Te núu jeē tú ley yā, te ma cúni cuíti rī jeē iyó cuéchi rī. Chi ma cúni rī jeē cuēchi cúu jeē ndíyo ni rī ndajníñu jnāhan rī núu tu ní cáhán ley jeē ma ndíyo ni yō. ⁸ Te súcuan ni nihīn cuēchi modo cocuu jín rí. Chi siquī jeē ndácu ley jniñu jeē ma sáha yó cuéchi, te ni quejéé ndíyo ni rī sáha rī tāca jéē neé. Te núu jeē tu ley, te suni tú na jnūhun stívi yó siquī ley nuú. ⁹ Chi ni īyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuéchi rī, te ni nduu rī nájñūhun ndīyi. ¹⁰ Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú. ¹¹ Chi jín jéē ndácu ley un jniñu, te ni nihīn cuēchi modo cocuu jín rí, te ni stahú ruhū. Chi jín jéē ndácu ley jniñu, te cuēchi ni sáha jeē ní quenda jnūhun jeē jnahnū ndetū rī.

¹² Núu súcuan te íyó ndáā maá ley, te tāca jniñu ndácu chi íyó ndoo íyó ndáā vāha. ¹³ Núu súcuan te ley jeē iyó vāha ún, ¿á suu sáha jeē jnahnú ndetū rī naún? Tú cuíti. Chi sa suhva máá cuéchi cúu jeē sáha jeē jnahnú ndetū rī, te súcuan stúu cuēchi ndese íyó máá. Chi jín jniñu vāha jeē ndácu ley te ni natūu jniñu neé jéē cúu cuēchi.

¹⁴ Chi jíní yō jeē nuū maá Espíritu vēji ley. Te ruhū chi sa névāha rī ñn modo neé máá rí jeē ni squívi ruhū jejníñu cāha rí nuū cuéchi. ¹⁵ Chi tāca jéē sáha rī, tu jécūhun ni rī najehē cúu jeē sáha rī.

Chi jniñu váha jeē cuní rī sáha ri, tu ndé níhín rī fuerza sáha ri, chi sa suhva sáha ri jniñu neé jéē tu cúvaha ni rī sáha ri. ¹⁶ Te náa sáha ri jniñu neé jéē tu cúní rī sáha ri, núu súcuan te nácuni rī jeē iyó ndáa ley. ¹⁷ Núu súcuan te nasūu rúhū cúu jeē sáha jniñu neé un, chi modo neé jéē ñúhun ini anuá rī cúu jeē sáha cuēchi. ¹⁸ Chi jíni rī jeē modo maá rí jeē névaha ri ini anuá rī, tú cuíti na vé jeē váha íyó. Chi cúní rī sáha ri jniñu váha, te tu ndé níhín rī fuerza sáha ri. ¹⁹ Chi jniñu váha jeē cuní rī sáha ri, tu sáha ri. Te jniñu neé jéē tu cúní rī, sa yūcuan sáha ri. ²⁰ Te náa sáha ri jniñu jeē tu cúní rī sáha ri, te nasūu rúhū cúu jeē sáha, chi modo neé jéē ñúhun ini anuá rī cúu jeē sáha.

²¹ Núu súcuan te ni jini rī jeē súcuan cúu jíin rí: Vēsú cuní rī sáha ri jniñu váha, te sa máni modo neé cúu jeē ñúhun ini anuá rī. ²² Chi cúsi ni rī jíin ley Yaā Dios nde jíin ini anuá rī. ²³ Te ni nacuni rī jeē iyó inga modo neé máá rí jeē jésí nuū jeē cuní rī sáha ri jeē váha. Te cúu ri nájñuhun preso nuū cuéchi jeē jícu jíin rí.

²⁴ Nacā jeē ndahú gá cúu ri núu súcuan. ¿Ndé ñn jnama ruhū nuū modo neé máá rí jeē jícu jíin rí jeē jnahnú ndetū rī? ²⁵ Na cútahū ndasí rí nuū Yaā Dios, chi máá yá cúu jeē jnáma ruhū nuū modo neé rí síquī jeē ni jíhī Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé máá yó sáha jeē jejniñu cāha yó nuū cuéchi.

Siquī jeē jícu yó jíin modo cuní Espíritu Yaā Dios

8

¹ Núu súcuan te ma ndénehen Yaā Dios cuēchi siquī ñayuu cáyihī ndaha Cristo. Chi tuá cájica i jíin modo neé máá i, chi sa suhva cájica i nájnūhun cúní maá Espíritu yā. ² Chi modo jeē sáha Espíritu cúu jeē técu yō siquī jeē yíhī yó ndaha Cristo Jesús. Te yūcuan ní sáha jeē ní nduu libre yō nuū jnūhun jeē ni yíhī yó chíji cuēchi jeē jnahnú ndetū yō nuú. ³ Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíin ley Moisés, siquī jeē tú na fuerza i jíin modo maá i jeē squícu i ley un. Chi ni taji yá Sēhe ya ni quiji, te ni nduu ya nájnūhun ñayuu cáhīyo cuēchi, návāha socō yā maá yá siquī cuéchi, vēsú tú na cuēchi ya. Te súcuan ni ndonda Yaā Dios siquī cuéchi jeē ní casáha ñayuu jíin modo neé máá i. ⁴ Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíin modo neé máá yó, chi jíca yó nájnūhun cúní maá Espíritu.

⁵ Chi ñayuu jeē cájica jíin modo neé máá, chi máni ndíhví ni i siquī jeē cuní maá i. Te ñayuu jeē cájica nájnūhun cúní Espíritu, chi máni ndíhví ni i siquī jniñu cúní maá Espíritu. ⁶ Te jeē ndíhví ni yō siquī modo cuní maá yó sáha jeē jnahnú ndetū yō. Te jeē ndíhví ni yō siquī jniñu cúní maá Espíritu, sa suhva sáha jeē cotecu yō ní cáni te coo ndeyí coo sī ni yō. ⁷ Chi ñayuu jeē ndíhví ni siquī modo neé cúní maá i, chi jíto uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸ Jeē yúcuan, ñayuu jíca jíin modo cuní maá, tu cúu sáha i jeē cúsī ni Yaā Dios jíin i.

⁹ Te máá ró jijnáhan ró, chi tuá cájica ró jíin modo cuní maá ró, chi cájica ró nájnūhun cúní Espíritu,

chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰ Te núu ndéé Cristo ini rō, te vēsú ñn quiví te cuu yiquí cúñu rō jeē siquí cuēchi, te cotecu anuá rō siquí jeē ní ndahva Yaā Dios cuēchi ró. ¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiquí cúñu rō jeē cúu. Te sáha ya súcuan jeē jíin máá Espíritu yā jeē ndeé ini rō.

¹² Núu súcuan, hermano jijnáhan ró, ndéé jniñu yó jéē caca ndaā yō, te nasūu jéē sáha yó modo neé cúní maá yó. ¹³ Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snāā rō tācá jniñu cásáha ró jíin modo neé máá ró, te cotecu rō ní cání.

¹⁴ Chi tāca ñáyuu jeē cándiquñ modo jeē steén Espíritu Yaā Dios, máá i cácuu sēhe Yaā Dios. ¹⁵ Chi Espíritu jeē ní canihñ rō, tu ní sáha ya rohó jéē cuu ró nájnūhun mozo nuū yā jeē yūhú tucu ró núu yā, chí sa ní sáha ya jeē cúu yó sēhe ya. Te jeē yúcuan cúu jeē cahán jee yó: Tátá maá ná. ¹⁶ Te máá Espíritu steén yā ini anuá yō jeē cúu ndije yó sēhe Yaā Dios. ¹⁷ Te núu sēhe ya cácuu yó, te suni nihñ yō maá táhū jeē ní jéjnūhun ya, te ñn cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸ Núu súcuan te sáha ri cuenta jeē tāca jnúndóho jeē ndóho yó vijna, lúlí ndasí cúu nuū jnúhun jeē cujéhnu luu yó jíin yá cucuéé gá. ¹⁹ Chi ndihí jeē ní jécōo, yōhoyo cándētu jeē na sáha Yaā Dios jeē nduvāha, quiví quénda ndijin jeē cujéhnu sēhe Yaā Dios jijnáhan i. ²⁰ Chi tāca jéē ní jécōo, chí ní

quiv̄i ch̄iji jnūhun jeē tu quéndōo vāha. Te nasūu jēē ní castiv̄i máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándetu jeē ndúvāha. ²¹ Chi ñin quiv̄i te tāca jēē ni jécōo, chi quenda ch̄iji jnūhun jeē tiv̄i jíin jēē tehyú. Te nduluu ndasí nájñūhun coo tāca séhe Yaā Dios, chi cācu nuū jnúhun jeē tu quéndōo vāha. ²² Chi jíin yō jeē tāca jēē ni jécōo, chi nde vijna te nájñūhun ñnuú-ni cándoho te cájitū ni jeē na ndúvāha ndih̄i. ²³ Te nasūu máá-ni tāca jēē ni jécōo cúu jeē ndóho, chi suni nde maá yó ndóho yó, vēsú je névāha yó Espiritu jeē cúu seña jeē ñin quiv̄i te nih̄in yō ndih̄i tahū yō. Chi yōhyo ndóho yó jnúndóho, te ndétu yó jēē náquihin séhe ya yohó te jnama ya yiqui cúñu yō jeē tuá ndoho yó jíin. ²⁴ Chi ni jnama ya yohó síqūi jeē ñūhun ni yō jeē súcuan coo. Te núu je ni sáha ya nájñūhun ñūhun ni yō, yūcuán na te tuá ñūhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵ Te núu ná tu coto yó jēē sáha ya jeē ñūhun ni yō, yūcuán na te jíin paciencia ndétu yó jēē sáha ya.

²⁶ Te suni súcuan máá Espiritu chindéé ñáhán yá yohó jēē tú na fuerza ini yō. Chi tu jíin yō cacān tahú yō nájñūhun cánuú. Te máá Espiritu cahán ndahú yá jíin Yaā Dios jehē yō síqūi tāca jēē jítu ndasí ni yō te tu níh̄in yō jnūhun ndese cacān tahú yō. ²⁷ Te máá Yaā Dios jeē jító ndee anuá yō, chi jíin yā tāca jēē cuní maá Espiritu cahán yā jehē yō. Chi ñayuu cáyih̄i ndaha Yaā Dios, cáhán ndahú Espiritu jehē i nájñūhun cuní Yaā Dios.

Vāha-ni cúndeyí yó síqūi ndih̄i jeneé

28 Te jíni yō jeē tācá-ni jeē quíji nuū ñáyuu manī jíin Yaā Dios, jeē váha chí jéē uhú, chí quéndōo vāha ga i nuū yā, sáha ya jíin táca jéē yúcuan. Chí cácuu i ñayuu jeē ní cana ya i ni quívicoo i ndaha ya síquī jeē súcuan ni tee ni yā nde jenahán. 29 Chí nde ná tu coo i te je jíni yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Sēhe ya ñani jéhnú nuū cuehē ñayuu cácuu ñani cácandíje. 30 Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnú i.

31 ¿Te ndese ga cahān yō síquī jnúhun jéhnú yáha núu súcuan? Chí núu íne Yaā Dios jíin yó, ¿te ndé ñn cuu cahān síquī yō? Tú ni ñn. 32 Chí máá yá tu ní jnáma ya Sēhe ya jeē ma cúu yā, chí sa suhva ni jēhe ya Sēhe ya ni jíhī yā jehē ndíhi yó. Te núu súcuan ni jēhe ya Sēhe ya, te nagā ni cuu jeē ma cuáha ya táca gá jeē jíni ñúhún yó. 33 ¿Te ndé ñn cuu cahān cuēchi síquī ñayuu jeē ní nacāji Yaā Dios? Tú ni ñn. Chí máá yá ni ndahva yā cuēchi i. 34 ¿Te ndé ñn cuu ndenehen cuēchi síquī yō núu súcuan? Tú ni ñn. Chí máá Cristo cúu jeē ni jíhī yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnú ya, te cáhán ndahú yá jíin Yaā Dios jehē yō. 35 ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jéē yí sáha, chí jéē cájito xeēn ñayuu yohó, chí jnámā, chí jéē cúmanī sahma, chí jnúhun yúhú, chí jéē cáhni i yóhó naún? Ni ñn táca jéē yáha. 36 Chí súcuan yósó núu tútu ñi jeē cácahān ñayuu cácandíje jíin Yaā Dios:

Jeē siquí maá ní te ndihi-ni hora cáconi i cahni i sãñá.

Te cásáha i jín ná nájñuhun cásáha i jín lanchi, quití cúū.

Achí tutu. ³⁷ Te tuú chi vēsú cándoho yó táca jēē yáha, te vāha-ni cúndeyí yó siquí ndihi-ni, sáha máá Yaā jeē ní cundáhú ni yohó. ³⁸ Jeē yúcuan cúcáhnú ni rī jeē tú ni ñn cuu quenehen yóhó núū jñuhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jēē neé jēē cácujuhnu jñí poder, ni jeē iyó vijna, ni jeē cóo, ³⁹ ni jeē iyó núū sūcún, ni jeē iyó núū cūnú, ni tāca gá jeē ní jecōo, ma cúu cuiti quenehen yóhó núū Yaā Dios, jeē jín Jítoho yō Cristo Jesús ni cundáhú ni yā yohó.

Siquí ndese ni nacāji ya yucūn Israel

9

¹ Te cáhán ndaā rī chi cúu ri tēe cándíje Cristo, te tu stáhú rí, te jíní rī ini anuá rī jeē cahán ndaā rī sáha Espíritu Santo. ² Yōhyo cúcuíhyá ni rī, te níní jnáhuhū ni anuá rī ³ jeē siquí tāca jnáhan ri ñayuu nación hebreo, chi ñn-ni yucūn rī jijnáhan ri. Chi jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jín yúcuan te cuu cācu ánuá maá i núú. ⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jín i sáá. Te jín máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū máá i ni jejnūhun ya cuehē jñuhun. ⁵ Te máá i cácuu yucūn tāca jí yō jeē ní cacujéhnu, te suni yucūn máá i ni cacu Cristo jeē ní nduu ya tēe. Te máá yá

cúu Yaā Dios jeē jn̄i nd̄ih̄i-ni, te n̄í cáni cahān ñayuu jeē kujénu ya. Amén.

⁶ Te nasūu jéē tu ní quée ndaā tāca jnúhun jeē ni jéjnūhun Yaā Dios nuū ñayuu Israel. Chi ní quee ndaā nahín núu vēsú jecu-ni i, chi tú nd̄ih̄i-ni yucūn Israel cúu jeē cá candíje. ⁷ Chi nasūú nd̄ih̄i yucūn Abraham cácuu ndije sēhe de jeē ni jéjnūhun ya. Chi ní cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. ⁸ Te jnúhun yáha cúní cahān jeē ni ñn̄ ñayuu tu cúu i sēhe Yaā Dios síquī jeē ní cacu i ñn̄ yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹ Chi yáha cúu jnúhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ñn̄ sēhe yí ñasihí ró Sara, achí yá.

¹⁰ Te nasūu máá yáha-ni, chi suni Rebeca ni cacu uū sēhe yí ña, te ñn̄-ni tátá nd̄indúú i, jeē ní cuu jíi yō Isaac. ¹¹⁻¹³ Te nde ná tu cacu nd̄indúú i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajníñu i nuū súchi sánd̄ih̄í, achí yá. Chi suni súcuan cáhán tutu i: Ni jito maní rī Jacob, te Esaú chi tuú, achí Yaā Dios. Te súcuan jíni yō jeē maá Yaā Dios cuu nacāji ya ñayuu núu ndese téé ni maá yá, te nasūu síquī jniñu jeē sáha i, chi sa suhva síquī ndese cúní maá yá nacāji ya i.

¹⁴ ¿Nde se cahān yō núu súcuan? ¿A jéē tu íyó ndāā Yaā Dios jeē sáha ya súcuan, chí naún? Tú cuiti. ¹⁵ Chi nde jenahán ní cahān yā jíin Moisés: Ndé-ni cúu jeē cúní rī cundáhú ni rī, te cundáhú ni rī. Te ndé-ni cúu jeē cúní rī sáha ri jeē váha jíin, te sáha ri jíin, achí yá. ¹⁶ Núu súcuan te nasūu síquī jeē cúní

maá ñáyuu, ni nasūu jēē nducú ndéyí máá i cúu, chi siquī ndese cúní maá yá cundáhú ni yā i. ¹⁷ Chi suni súcuan yósó núu tútu īi jeē ni cáhān yā jīn rey ñuu Egipto: Ni jeni ri rohó jēē cúu ró rey, návāha jīn rōhó te stéén rī poder rī, te návāha cuitē núu síhví rí ñí ñáyīví, áchí yá. ¹⁸ Núu súcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunīhni ni, te sáha ya jeē cunīhni ni.

¹⁹ Te sanaa te cahān ñn ró jīn rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. ²⁰ Te sa suhva cáhān rī jīn ró: Róhó, ¿ndé ñn cúu ró jēē jeni ni rō stió cuñí rō nuū Yaā Dios? ¿A cuu cahān quīsi ñuhun jīn téē ni sáha: Najehē ni sáha ró rúhū súcuan? achi. ²¹ Chi tēē sáha quīsi, cuu sáha de ndese cúní maá de, chi ñn-ni ñuhun cuu sáha de ñn quīsi fino te inga quīsi corriente.

²² ¿Te á tu jétáhú ró jeē suni súcuan sáha Yaā Dios jīn ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vēsú súcuan te ni īyo paciencia ni yā jeē tu ní ndóna yachī yā siquī ñáyuu jeē jnahnú ndetū. ²³ Te sáha ya súcuan návāha stéén yā ndese yōhyo luu cújéhnu ya siquī jniñu sáha ya jīn yóhó ñáyuu cundáhú ni yā. Chi nde jenahán je ni sátūhva ya yohó jēē luu cújéhnu yó jīn yá. ²⁴ Chi ni cana ya yohó jēē candíje yó, te sava yó cúu ñáyuu hebreo te sava yó cúu ñáyuu tāca gá nación. ²⁵ Chi suni súcuan ni cahān yā, yósó núu tútu Oseas:

Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñayuu jeē tu ní íyo manī rī jín, vijna te cahān rī
jeē cácuu i ñayuu jeē manī rī jín.

26 Te máá lugar nuū ni cáhān rī jeē násūu ñáyuu rī
cácuu i,

suu yūcuan cáhān ñayuu jeē cácuu i sēhe Yaā Dios,
Yaā técu ní cáni.

Achí yá. 27 Te Isaías sa suhva ni cahān de jnūhun
ñayuu Israel: Vēsú ni cayā yucūn Israel nájñūhun
ñíí yumar, te jecu-ni i jnama ya. 28 Chi Jitoho yō
Yaā Dios, yachī sínu ya jniñu jeē sándaā yā cuēchi
ñayuu ñayiví. Achí tutu. 29 Chi nájñūhun ni cahān
tucu Isaías:

Máá Yáa cúu Jitoho nuū tācá ndajéhé andiví, núu tu
ní jnáma ya jecu yucūn yō nuú,

te je ni ndoho yó nájñūhun ñayuu ñuu Sodoma jín
ñuu Gomorra, jeē ní naa ndihi.

Achí tutu.

Jeē tu cájetáhú ñayuu hebreo jnūhun jnama ya i

30 ¿Ndese cahān yō núu súcuan? Suu jeē ñáyuu tāca
gá nación, vēsú tu ní cánducú i quendōo ndaā i nuū
Yaā Dios, te ni ndahva yā cuēchi i. Chi siquī jeē ní
candíje i jeē ni jíhī Cristo jehē i cúu jeē ní ndahva yā
cuēchi i. 31 Te sa suhva ñayuu Israel, vēsú cánducú
i quendōo ndaā i nuū Yaā Dios sáha ley yā, te tu
cúndeyí i quendōo ndaā i. 32 ¿Te najehē? Siquī jeē
tu cánducú i jeē ndahva yā cuēchi i jeē candíje i jeē
ni jíhī Cristo jehē i, chi sa jéni ni i jeē squícu máá
i ley te quendōo ndaā i. Te jeē stíví i súcuan cúu
nájñūhun cácotúú i siquī maá yúu jeē cácachihí jehē,
te suu cúu Cristo. 33 Chi súcuan cáhán nuū tútu i:

Nde ñuu rī Sion sáha rí jeē cóne maá Yaā jeē cúu

nájñūhun yuū jeē cácachihí i jehē i.

Te cúu ya nájñūhun toto jeē cotúú i sáha.

Te sa suhva ñayuu cá candíje Yaā ún, chi jnama nahín yá i.

Achí Yaā Dios.

10

¹ Hermano jijnáhan ró, cúu ndasí ni rī te jícán tahú rī nuū Yaā Dios jehē ñayuu nación rī Israel, jeē na jnáma ya i jijnáhan i. ² Chi cáhán rī jeē vāha cásáha i jeē ndihví ni i cáchiñúhún i Yaā Dios. Te vēsú súcuan te cáchiñúhún cáhá i. ³ Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i. ⁴ Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ni sáha Cristo jehē i.

⁵ Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ñin ñayuu cuu squícu i táca jniñu ndácu ley, te cotecu i núú, áchí. ⁶ Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró. ⁷ Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájnūhun jeē tu ní nátecu yā. ⁸ ¿Te ndese cáhán jnūhun un núu súcuan? Yajni iyó jnúhun ya jíin ró, chi ñúhun ini yuhu ró jíin ini anuá rō, achí tutu. Te suu cúu jnūhun jeē na cándíje yó jéé jnáma ya yohó. Te jnūhun yáha cúu jeē cánacani rī. ⁹ Chi núu cahān rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó. ¹⁰ Chi jíin ini jíin ánuá yō cándíje yó jéé ni

jíhī yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítóho yō cúu Jesucristo, te súcuan te jnama ya yohó.

¹¹ Chi cáhán tutu iī: Tāca ñáyuu jeē candíje i ya, chi jnama nahín yá i, áchí. ¹² Chi inuú-ni cúu ñayuu hebreo jíin táca gá ñayuu, chi máá yá cúu Jítóho nuū ndíhi yó, te cuehē jeē váha sáha ya jíin ñáyuu cácahān ndahú jíin yá. ¹³ Chi súcuan cáhán jnūhun ya: Ndíhi ñayuu cácahān ndahú jíin máá Jítóho yō, chi jnama ya i, áchí. ¹⁴ ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuū i? ¹⁵ ¿Te ndese nacani ñayuu jnūhun ya te núu jeē tu tájí yá i quihīn i? Chi nájnūhun cáhán tutu iī: Yōhyo luu jniñu cásaáha ñayuu cájica jíin jnūhun ndeyí sñ ni jeē cánacani i jnūhun váha ya, achí.

¹⁶ Te nasūū ndíhi i jétáhú nuū jnūhun jnama ya i. Chi ni cahān Isaías nde jenahán: Tátā Yaā Dios, ¿ndé ñáyuu ni candíje jnūhun jeē cánacani ná víi? áchí de. ¹⁷ Núu súcuan te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

¹⁸ Te cájnūhun rí: ¿A tu ní cájini sōho i jnūhun un núu súcuan? Tuú chi ni cajini sōho i, chi cáhán tutu iī:

Nñ ñáyiví ní cajini sōho ñayuu jnūhun jeē ní canacani de.

Te nde nuū jicá gá tāca lado ni jinū jnūhun ún.

Achí tutu. ¹⁹ Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xīhna gā Moisés ni cachi de jeē ni cáhān Yaā Dios:

Cucuíñí ró jijnáhan ró, chi cuáha ri jnūhun ri nuū
inga ñayuu jeē násūú ñn nación cúu.

Te quítí ni rō coto ró jéē cuáha ri jnūhun ri nuū ñn
nación jeē tu jécūhun ni.

²⁰ Te suni Isaías ni chundeyí ni de ni cachi cājí de
jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i
ndese Yaā cúu ri.

²¹ Te siquī ñayuu Israel sa ni cahān de jeē ni cáhān
yā: Ndiquiví ni cana ri i jeē quívicoo i nuū rī, te tu
ní cácuni i, chi ñayuu nīhni ni, ñayuu jéē ni cácuu i.
Achí yá, achí Isaías.

Jeē iyó jecu na ñayuu Israel jeē jnáma ya

11

¹ Núu súcuan te cájnūhun rí: ¿A ní stóo Yaā Dios
ñayuu maá yá Israel, chí naún? Tú cuiti. Chi ruhū
suni tēe Israel cúu ri, te yucūn Abraham cúu ri, te
Benjamín cúu jí rī jenahán. ² Tu ní stóo Yaā Dios
ñayuu maá yá, chi je ni nacāji ya i nde jenahán. ¿A
tu cájini rō ndese cáhān tutu ī jnūhun Elías, tēe ni
nacani jnūhun ya jenahán? Chí náa jícán tahu de,
te ni cahān de siquī ñayuu Israel: ³ Tātā Yaā Dios,
ni cajehni i tāca tēe cánacani jnūhun ní, te ni cajenu
i tācá altar ní. Te máñuhún na sāña ní quendōo, te
vijna suni cácuni i cahni i sāña, áchí de. ⁴ Te Yaā
Dios ni nastió cuíñí yā: Iyó nahín úxā mil ñayuu
cácañdije ruhū jeē tu ní cájecuñí yítí i nuū ídolo naní
Baal, achí yá. ⁵ Te suni súcuan vijna, chí iyó jecu na
ñayuu jeē ní nacāji ya siquī jeē váha ni yā jíin i. ⁶ Te
núu ni nacāji ya i siquī jeē váha ni yā jíin i, te nasūu

síquī jeē ni sáha i jniñu váha cúu. Chi núu síquī jeē ni sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ní canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i, ⁸ nájnūhun cáhán tutu iī: Ni sáha Yaā Dios jeē tu jécūhun cuiṭi ni i síquī yā, ni tu jíní i jíin tñūú i, ni tu jíní nahín i jnūhun ya, te súcuan cúu nde vijna. Achí tutu. ⁹ Te suni ni cahān David:

Vico jeē casáha i, na cóo nájnūhun ñn trampa chí ñn xeyū,
návāha nihīn i castigo xeēn síquī jeē castívi i cásáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécostíhí jnūndóho síquī i ní cáni. Achí tutu.

Siquī jeē jnáma ya ñayuu tāca gá nación

¹¹ Núu súcuan te cájnūhun rí: ¿A tuá cúu cuiṭi ndīvi ñayuu Israel nuū Yaā Dios jeē súcuan ni castívi i? Tú cuiṭi. Chi sa suhva jeē ní cacunīhni ni i, te sa ñayuu tāca gá nación ni canihīn tahu máá i jnūhun jeē jnáma ya i. Te yūcuan sáha tucu jeē ñáyuu Israel condihvī ni i jeē suni candíje máá i. ¹² Chi jeē ní castívi i, te sa ñayuu ní cáhnu ñayīvi ní canihīn maá i jnūhun ya. Te jeē ní cajica yátá i, suu ni sáha jeē ní canihīn ñayuu tācá nación jnūhun ya. Núu súcuan te quīvi jeē ndívicoo tucu ndíhi ñayuu Israel ndaha ya, te ñayuu ñayīvi víhyá gā quendōo ndetū i sáha ún.

¹³ Te vijna te cáhán rī jíin róhó ñáyuu tācá nación jeē tu ní jíní jnūhun ya. Chi ni tají Yaā Dios ruhū

jeē scáca ri jnūhun nuū rohó ñáyuu tācá nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya. ¹⁴ Chi cúní rī jeē jíin yúcuan te nacani ni sava jnáhan ri ñayuu Israel jeē suni candíje máá i, te jnama ya i. ¹⁵ Chi jeē ni stóo ya ñayuu Israel, jeē yúcuan cúu jeē sa ñayuu ñayīví ní sáha ya jeē ndívícoo i nuū jnúhun manī yā jíin i. Núu súcuan te quivī naquihin tucu ya ñayuu Israel, quivī ún suni vāha ndasí sáha ya jíin ñáyuu ní cáhnu ñayīví. Chi coo nájnūhun jeē natecu i jeē cúu i nájnūhun ndīyi. ¹⁶ Te ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndíhi un cúu cuenta yā. Te ïin yujnu, núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñayuu Israel, yíhi cuenta i nuū yā, siquī jeē jíi i xīhna ñúhún, ni quívícoo de ndaha ya.

¹⁷ Chi ñayuu Israel cácuu i nájnūhun ndayújnu olivo vāha, te sava ndaha un ní quendē. Te rohó ñáyuu tācá nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu vāha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. ¹⁸ Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násūú jéē yoho stáa cajin nuū maá ró, chi sa máá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. ²⁰ Ndaā, te ni quendē i siquī jeē tu ní cácandíje i Cristo. Te rohó chi máni siquī jeē cácandíje ró, jeē yúcuan cúu jeē ni quívícoo ró lugar

i. Te ma sándúxí ró maá ró núu súcuan, chi sa suhva conso Iyo ró núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró. ²² Núu súcuan te sáha vāha ro cuenta ndese vāha ni Yaā Dios jín ndese xeēn ni yā. Chi ni nduxeēn ni yā jín ñayuu hebreo jeē ní castívi ún, te sa cúndáhú ni yā rohó. Te cánuú cuiñi nīhin ro jín jnúhun jeē vāha ni yā jín ró. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴ Núu súcuan te róhó ñayuu tācá nación jeē tu ní jín jnúhun ya, ni quendē rō xinī yújnu olivo yucú, te ni nachuhun ya rohó xínī yujnu olivo vāha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu vāha ún.

Ín quiivī te jnama ya ndihī ñayuu nación Israel

²⁵ Hermano, cúní rī jeē na jécūhun ni rō jijnáhan ró ndese íyó jnúhun yáha jée ní yisāhí, návāha ma cutéyí ró caní ni rō jeē ndichí xíní maá ró: Chi sava ñayuu Israel ni ndunīhni ni i, te súcuan coo máá-ni nde quiivī jínu candíje ñayuu tācá nación jeē tu jín jnúhun ya. ²⁶ Te sáá te jnama ya ndihī ñayuu nación Israel, chi cáhán tutu ī:

Ichi ñuu rī Sión quiji Yaā jnáma ñayuu,
te sáha ya jeē tuá coo cuēchi nuū tāca yúcūn Jacob.

²⁷ Te yāha cúu contrato jeē sándaā rī jín i,
quiivī jeē quende ri cuēchi i jijnáhan i, áchí Yaā Dios.
Achí tutu.

²⁸ Chi ñayuu hebreo un ní nduu i nájnūhun enemigo Yaā Dios siquī jeē tu ní cácandíje i jnúhun

jnáma ya i. Te jeē yúcuau te cuu cuitē núu jnūhun un núu tāca róhó. Te vēsú súcuau te siquī jeē ní nacāji ya tāca jíi i jenahán, te cúndáhú gá ni yā i jeē ma stóo ya i ní cáni. ²⁹ Chi tu nácani yátá ni yā jeē cána ya ñayuu jíin jéē jéhe ya tahū i. ³⁰ Te róhó jíinánhan ró, suni ni cahīyo nīhni ni rō nuū Yaā Dios nde saá. Te vijna jeē ní cacunīhni ni maá ñayuu hebreo, te cúndáhú ni yā rohó. ³¹ Te suni súcuau maá i, chi vēsú cacunīhni ni i vijna, te cundáhú tucu ni yā i, nájnūhun cúndáhú ni yā maá ró jijnánhan ró. ³² Chi Yaā Dios ni sáha ya jeē ní quendōo ndivii ñayuu chíji jnúhun cúnīhni ni i, návāha suni cuu cundáhú ni yā ndivii i.

³³ Núu súcuau te náhan náa ni yō jeē yóhoyo cuehē jnūhun ndíchí iyó jíin Yaā Dios, te ndihí cuiti jini yā. Te ni ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ni yō ndese cúu tāca jéé sáha maá yá. ³⁴ Chi cáhan tutu iī: ¿Ndé ñn ni jecūhun ni ndese jéni ni maá Jítóho yō? ¿Chí ndé ñn ni steén nuū yā? ³⁵ ¿Ndé ñn ni jéhe xīhna gā nuū maá yá, návāha nachunaa yā nuū i? ³⁶ Chi nde nuū maá yá vēji tāca jéē iyó, te maá yá ni sáha ndihí, te jeē cúu maá yá cúu. Te na cáhan yō jeē yóhoyo luu cújéhnu Yaā Dios ní cáni. Amén.

Jeē na cóo ndoo ánuá yō cuajníñu yó núu Yaā Dios

12

¹ Núu súcuau te cáhan ndahú rí jíin ró jijnánhan ró, hermano, jeē siquí jeē cúndáhú ni Yaā Dios yohó. Na sócō rō maá ró núu yā, coo ndoo coo iī rō cuajníñu ró núu yā, nájnūhun cúsi ni yā. Chi yāha cúu jeē chíñúhún ró yā nde jíin ini jíin ánuá rō. ² Te

ma cáca ró jíin táca modo casáha ñayuu ñayiví yáha, chi sa na sáma ró modo cani ni rō, te ndujeé jéé níjnūnī rō. Te súcuan te cuu nacāji ró ndé-ni cúu jeē váha jeē nújnahan ni Yaā Dios, jeē cúshī ni yā, jíin jéé íje ni rō jíin jnúhun ya.

³ Te siquī jeē váha ni yā ni jēhe ya jniñu nácani ri jnúhun ya, jeē yúcuan cáhán rī jíin ndihī ró jéé ma cáni ni rō jeē váha ga ñayuu cúu ró núú cūhva jeē iyó ró. Chi ná ñn ná ñn ró na cáni ndaā ni rō siquī maá ró, te ma scáa ga rō cani ni rō jeē váha ga ñayuu cúu ró vésú nuū cūhva jeē ni jēhe Yaā Dios fuerza ini rō cándíje ró. ⁴ Chi cácuu yó nájnuhun ñn yiqui cúñu jeē iyó cuéhē parte, te sñn sñn jéjníñu ñn ñn. ⁵ Chi vésú iyó cuéhē yō, te nájnuhun ñn-ni yiqui cúñu cúu yó jéé yíhi yó ndaha Cristo, chi ñn-ni ni nduu yó jíjnáhan yó.

⁶ Te sñn sñn tahū ni jēhe Yaā Dios nuū yō jeē cuajníñu yó núú yā, núu ndese ni nujnahan ni yā ni jēhe ya nuū ñn ñn yó. Núu súcuan te na cuájníñu vāha yó jíin táhū ún. Núu ni nihīn yō tahū jeē nácani yó jnúhun ya, te cánuú sáha yó ndé maá cūhva ni jēhe ya cándíje yó. ⁷ Te núu ni nihīn yō tahū jeē chindéé ñáhán yó jnáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō. ⁸ Te ñayuu jeē stihvī ni inga ñayuu, suni na sáha yúcún i. Te ñayuu jēhe nuū jnáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jíto ndáhú ñayuu ndahú, na cúshī ni i sáha i.

Ndese cánuú squícu ñayuu cácandíje

⁹ Te na cúndáhú ndije ni rō jnáhan ró, nasūu maá jéé cahán-ni ró. Te coto uhū rō jniñu néé, te

condiquīn rō jniñu váha. ¹⁰ Te cánuú coo manī rō jín jnáhan ró nájñuhun jēē maní rō jín ñani rō. Te nducú ró jēē quéndōo yñúhún gá jnáhan ró vēsú maá ró.

¹¹ Te ma cucúxí ró jín jniñu cásáha ró. Chi jín ini jín ánuá rō condihvī ni rō cuajniñu ró núu maá Jítoho yō.

¹² Te na cúsiñ ni rō jēē cáñuhun ni rō tāca jēē váha jēē cóo. Te na cuándeyí ni rō núu ndóho ró jnúndóho. Te níni na cacán tahu rō.

¹³ Te coto ndáhú ró ñayuu cácandíje núu cúmanī nuū i. Te cuāha núu ró vehe nuū ñayuu cájica.

¹⁴ Te cacān tahu rō jehē ñayuu cájito xeēn rohó. Ma cahán ndevāha ro síquī i, chi sa cacān tahu rō jehē i.

¹⁵ Te núu cúsiñ ni ñayuu, te suni na cúsiñ ni rō jín i. Te núu cúcuíhyá ni ñayuu, te suni na cúcuíhyá ni rō jín i.

¹⁶ Na cóo ñnuú ni rō jín táca jnáhan ró. Te ma cundúxí ró, chi sa quijnáhan ró jín ñáyuu núu ga. Ma cáni ni rō jēē ndichí xínī rō.

¹⁷ Te ma nasáha ndevāha ró jín ni ññ ñayuu, núu ni sáha ndevāha i jín ró. Na cóndihvī ni rō sáha ró jniñu váha, jító jínúū tāca ñáyuu. ¹⁸ Te na cóndihvī ni rō coyūcu mánī rō jín táca ñáyuu, vēsú ndese cándāa máa i. ¹⁹ Ñánī mánī jijnáhan ró, ma nácuāha ró jēē ndútahū ñayuu casáha ndevāha jín ró, chi sa cuāha ró jnúhun jēē maá Yaā Dios cuāha ya castigo i. Chi cáhán tutu ñi: Máa rí cuāha castigo i, máa rí nacuāha yāhu i, áchí Jítoho yō. ²⁰ Te suni cáhán tutu: Tēe jító uhū rohó, núu jíi de sōco, te cuāha ró jēē cáji de. Te núu jíchí de, te cuāha ró jēē cóho de. Chi núu

sáha ró súcuan, te cucanu de te nacani uhū ni de jeē ni jíto uhū de róhó. ²¹ Ma cuáha ró jnúhun jeē cúndeyí jniñu néé jíin ró, chi sa jniñu váha na sáha ró návāha ndahvā jniñu néé.

13

¹ Tāca ñáyuu na cuatáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máa Yaā Dios. Te tēe cándiso jniñu chi Yaā Dios ni tee jniñu siquī de. ² Te ñáyuu jeē tu jétáhú núū tēe cándiso jniñu, núu súcuan te cúnihni ni i nuū jeē ní jeni Yaā Dios. Te ñáyuu jeē cúnihni ni, chi cuēchi sáha i, te nihin i castigo. ³ Chi tāca tēe ndiso jniñu, nasūu jēe ndiso jniñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu néé. Te núu cúni rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de róhó. ⁴ Chi jéjniñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jniñu de stóho de ñáyuu. Chi jéjniñu Yaā Dios de, návāha cuāha de castigo ñáyuu casáha jniñu néé. ⁵ Jeē yúcuan cánuú jēe cuatáhú ró núū tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō. ⁶ Te jeē yúcuan cúu jeē suni cájēhe ró xúhun núū tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan casáha de.

⁷ Te chunaa rō ndihi jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró.

⁸ Ma cótaū rō nuū ní ñn. Te íyó ñn jeē taú rō jeē ma tahndé cuiṭi, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihi jeē ndácu ley yā. ⁹ Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndīyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te táca jnúhun yáha jíin táca gá jniñu ndácu ley, ndihi-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yūcuan cúu jeē squícu yó ní ley yā.

¹¹ Súcuan sáha ró jíjnáhan ró, chí sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vēsú quivī ní candíje yó jnúhun ya. ¹² Chi nájnūhun je yajni yáha jecuāā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néē, te na cúcutú yó jíin táca jniñu ndaā jeē caca yó jíin luz yā. ¹³ Na cáca yíñúhún yó nájnūhun cánuú caca yó jíin luz yā. Ma nájini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. ¹⁴ Chi sa suhva cuiñi cutú ró jíin fuerza maá Jítoho yō Jesucristo, jeē ma cuáha ga rō jnúhun sáha ró jniñu cúní modo neé máá ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jíin jnúhun ya, te

ma tejnáhan ró jíin i siquī tāca jnúhun jeē sín jéni ni i jíin máá ró. ² Chi íyó ñáyuu jeē jéni ni i jeē cúu caji i ndínuū-ni. Te íyó ñáyuu jeē ná tu ije jíin jnúhun ya, te cájeni ni i jeē tú vāha caji i cūñu, chi jeē ní casocō ñáyuu nuū ídolo cúu. ³ Te róhó tée jeē yéji ndínuū-ni, ma cahán rō coto ró tée jeē tu yéji ndínuū. Te róhó tée jeē tu yéji ndínuū, ma cahán rō coto ró tée jeē yéji ndínuū. Chi Yaā Dios ni jetáhú yá tēe ún. ⁴ Te róhó, ¿ndé ñn cúu ró jéē cahán neé ró jíto ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chi cuiñi vāha de, chi mozo maá Jítoho yō cúu de, te cuu sáha ya jeē ma stívi de.

⁵ Te suni íyó ñáyuu jeē jéni ni jeē íí gā ñn quiivī vēsú inga quiivī. Te inga ñáyuu chi jéni ni i jeē inuú-ni cúu tāca quiivī. Te tācá i na cúndaā vāha ni máá i siquī jeē jéni ni i. ⁶ Chi tēe jeē neé íí quiivī, chíñúhún de máá Jítoho yō jeē sáha de súcuan. Te tēe jeē tu neé íí quiivī, suni chíñúhún de Jítoho yō jeē sáha de súcuan. Te tēe jeē yéji ndínuū-ni, chíñúhún de máá Jítoho yō jeē sáha de súcuan, chi nácuatáhú de nuū Yaā Dios. Te tēe jeē tu yéji ndínuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni ñn yó tu técu yō jeē váha máá-ni yó, te ni ñn yó tu jíhí yō jeē cuní maá yó. ⁸ Chi núu técu yō, te técu yō jeē cuajníñu yó núu maá Jítoho yō. Te núu cuu yō, te suni cuu yō siquī jeē cuní maá Jítoho yō. Núu súcuan te núu jeē cótecu yō chí jéē cuu yō, te yíhi yó ndaha Jítoho yō. ⁹ Chi ni jihí Cristo te ni natecu yā, návāha cuu ya Jítoho nuū ñáyuu ni jíhí jíin ñáyuu técu.

¹⁰ Te róhó, ¿naun jéni néé ni rō jíto ró jnáhan ró núu súcuan? ¿Te naun cújéē ni rō jíto ró de? Chi táca yó cuiñi yó yuhu mesa Cristo jeē sándaā yā jniñu yó.

¹¹ Chi suhva yósó núu tútu iī:

Jendaá ndije chi nuū maá rí cuiñi yítí táca ñáyuu, te ndihí i cahán jeē maá rí cúu Yaā Dios, áchí máá Jítóho yō.

¹² Núu súcuan te ná ñn ná ñn yó nacuāha yo cuenta nuū Yaā Dios ndese jniñu ni casáha yó.

Ma sáha yó jéē quívi jnáhan yó cuēchi

¹³ Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñn jniñu jeē sáha jeē stívi jnáhan ró te quívi i cuēchi.

¹⁴ Te jíni rī jeē ni ñn jeē ni sáha Yaā Dios, tu stívi ánuá yō. Chi súcuan ni cucáhnu vāha ni rī síquī jeē candíje ri Jitoho yō Jesús. Te núu ñn ñayuu jéni ni i jeē iyó jéē stívi ánuá i, yūcuán na te súcuan sáha un jíin máá i. ¹⁵ Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snāā rō anuá jnáhan ró síquī jeē yéji rō ñn jeē jéni ni de jeē cuēchi cúu. Chi suni jehē maá de ni jihī Cristo. ¹⁶ Ma sáha ró jniñu jeē cahán i síquī, vésú jíni maá ró jeē iyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva síquī jeē na sáha yó jniñu ndaā, te coyūcu mánī yō jíin jnáhan yó, te cusī ni yō sáha Espíritu Santo. ¹⁸ Te ñayuu jeē súcuan jéjniñu nuū Cristo, chi cúsi ni Yaā Dios jíin i, te suni cájejnúhún ñáyuu i.

¹⁹ Núu súcuan te na cóndihvī ni yō coyūcu mánī yō, návāha jíin yúcuan chindéé ñájnáhan yó ije yó

jíin jnúhun ya. ²⁰ Te ma cuáha ró jnúhun jeē ndeyu yéji rō snāā jniñu ni sáha Yaā Dios jíin jnáhan ró. Chi iyó ndoo ndije ndihí jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jēē caji de jeē jéni ni de jeē cuēchi cúu. ²¹ Vāha ga ma caji rō cūñu, ni ma cóho ró vino, te ni ñn ma sáha ró jēē stívi ánuá jnáhan ró, te quívi de cuēchi, te caca yátá de nuū jnúhun cándíje de. ²² Te núu cándíje ró jēē tú na vé sáha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. ²³ Te tēe yéji ñn jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó váha jeē yéji de. Chi tāca jēē sáha yó, núu tu cándíje yó jēē iyó váha, te cuēchi cúu.

Jeē na sáha yó jēē cúsiñ ni jnáhan yó

15

¹ Te yóhó jēē ni íje yó jíin jnúhun ya, cánuú condito yó ñáyuu jeē ná tu íje jíin jnúhun ya, návāha cándíje vāha i. Te ma sáha yó jēē maá-ni yó cusíñ ni. ² Chi ná ñn ná ñn yó na sáha yó jēē cúsiñ ni jnáhan yó, návāha quendō vāha i te íje i jíin jnúhun cándíje i. ³ Chi ni Cristo, tu ní sáha ya jeē cúsiñ ni maá yá, chi sa suhva jeē cúsiñ ni Tatá yā. Chi suhva cáhán tutu íi: Tāca jnúhun ndevāha jeē cácahān ndevāha ñayuu siquī ní, ni ndívi siquī maá ná, áchí Cristo jíin Tatá yā. ⁴ Chi tāca jnúhun jeē ni jecosō nuū tútu íi nde jenahán, chi ni jecosō návāha stéén nuū yō, te nihín yō jnúhun jeē sáha jeē cuandeyí ni yō te ndusiñ ni yō. Te súcuan te cocuhun ni yō tāca jēē váha jeē cóo. ⁵ Te máá Yaā Dios jeē jéhe jnúhun cuandeyí ni

jiín jnúhun ndúsī ni, na sáha ya jeē cóo inuú ni rō, nájñūhun cúní Cristo Jesús. ⁶ Te súcuan te ñn-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tátá Jitoho yō Jesucristo.

Jeē ni jítē jñūhun vāha ya nuū ñáyuu tācá nación

⁷ Núu súcuan te cuatáhu ró tāca jnáhan ró, nájñūhun ni jetáhu Cristo yohó, návāha cuni ñayuu jeē luu cújéñnu Yaā Dios. ⁸ Chi cáhán rī jeē ní quiji Cristo Jesús, ni sáha ya tācá jniñu jeē quéndōo vāha ñayuu hebreo, návāha cundaā tāca jnúhun jeē ni jéjñūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñūhun ya. ⁹ Te suni ni quiji ya návāha ñayuu tācá nación jeē tu jíni jñūhun ya, cahān i jeē yóhoyo vāha ni Yaā Dios jeē cundáhu ni yā i. Chi suhva cáhán tutu iī:

Núu súcuan te cahān na jéē yóhoyo vāha ni ní, cuni ñayuu tācá nación,
te cata ná yaa jeē chiñúhún ná nihín.

¹⁰ Te cáhán tucu tutu iī:

Róhó ñáyuu tācá nación, inuú na cúsī ni rō jiín ñáyuu maá yá.

¹¹ Te cáhán tucu:

Róhó ñáyuu tācá nación, na cáhán rō jeē yóhoyo vāha ni Jitoho yō Yaā Dios,
te róhó ñáyuu tācá-ni ñuu, suni na cáhán rō jeē yóhoyo cújéñnu ya.

¹² Te suni ni tee Isaías jñūhun yáha:

Nuū yúcūn Isaí quiji ñn jeē cújéñnu,
te ndacu ya jniñu nuū ñáyuu tācá nación.
Te ñayuu ún chi cocuhun ni i tāca jéē sáha ya.
Achí tutu.

13 Te máá Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo sī ndasí ni rō jíin jéē cóo ndeyí ni rō siquī jeē cá candíje níhin ró yá. Te súcuan te cocuhun teyí gá ni rō tāca jéē váha jeē coo, sáha poder maá Espíritu Santo.

14 Ñánī mánī, cúcáhnū ni rī jeē váha ndasí cándihvī ni rō jíin jniñu váha, te vāha ndasí cájecūhun ni rō, te cúu stíhví jnáhan ni rō. 15 Te ni jeni ni rī jeē tee ri carta yáha cáhān cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha ri siquī jeē váha ni Yaā Dios te ni jēhe ya jniñu nuū rī 16 jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíní jnúhun ya. Te nácani ri jnúhun vāha Yaā Dios nuū i jeē jnáma ya i. Súcuan sáha ri návāha ñayuu tācá nación, cuu squívi ri i ndaha ya jeē cúu i nájnúhun in jeē socó rī nuū yā jeē cúsh ni yā jíin. Chi ni sáha Espíritu Santo jeē iyó ndoo iyó í i nuū yā.

17 Núu súcuan te siquī jeē candíje ri Cristo Jesús, te cúsh ni rī jeē jejniñu vāha ri nuū Yaā Dios. 18 Chi ma cúu cahān rī siquī jniñu cásaha inga tēe, chi máá-ni siquī ndese ni jejniñu Cristo ruhū jeē sáha ri jeē ñáyuu tācá nación tu ní jíní jnúhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rī jíin jniñu ni sáha ri. 19 Chi ni sáha ri jniñu jéhnū ndíso poder jeē steén jeē cujéhnū ya, te ni iyo poder Espíritu Santo jíin rí. Te súcuan ni nacani ndíhi ri jnúhun ndese jnáma Cristo ñayuu. Te ni nacani ri nde ñuu Jerusalén, jíin ndíhi tācá ñuu, jíin nde ní región Ilírico. 20 Súcuan cúu jeē ní condíhvī ni rī ni nacani ri jnúhun jeē jnáma ya ñayuu. Te ni

jehēn rī nuū ñáyuu jeē ná tu cuni jnūhun Cristo, chi tu ní cúni rī nacani ri nuū ñáyuu jeē jé ni jini i ni canacani inga tēe. ²¹ Chi sa suhva ní sáha ri nájnūhun cáhán tutu i:

Tāca ñáyuu jeē tu ní quíji jnūhun ya nuū i, vijna chi cuni i jnūhun ya, te tāca ñáyuu jeē tu ní jíní cuiti jnūhun ya, vijna chi jecūhun ni i.

Achí tutu.

Jeē ñūhun ni Pablo jeē quihín de Roma

²² Te jeē yúcuan cúu jeē cuehē jínu ni cujnéñu ri, te tu ní cúu jecondēhe rí rohó jíjnáhan ró. ²³ Te vijna chi ni ndihí jniñu ri ní cáhnu tācá región ndañúú yáha. Te je ni cuu cuehē cuiyā jeē cuní rī jeē rī nuū rō. ²⁴ Núu súcuan te ñūhun ni rī jecondēhe rí rohó jíjnáhan ró núu na yáha ri quihín rī España. Te ñūhun ni rī jeē núu je ni cusí ni rī jeē ní jito jnáhan yó, yūcuán na te chindéé ñáhán ró ruhū jeē quihín gā rī. ²⁵ Te xīhna gā na quihín rī ñuu Jerusalén quindēca ri xūhún cuu hermano cáyūcu yúcuan. ²⁶ Chi ñayuu Macedonia jíin Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. ²⁷ Chi súcuan ni cacusí ni i ni casáha i. Te íyó váha jeē súcuan, chi máá i jeē cácuu i ñayuu tāca gá nación, táú i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo vāha ánuá i sáha. Jeē yúcuan cánuú jéé chindéé ñáhán i ñayuu hebreo cá candíje jíin ndajníñu ñayiví yáha. ²⁸ Núu súcuan te jeē jínu jniñu yáha jéé quindēca ri xūhun yáha nuū i, yūcuán na te jecondēhe rí rohó jíjnáhan ró jéé yáha ri quihín rī España. ²⁹ Te jíní vāha ri jeē quiví jinú

rī nuū rō, te vāha ndasí quendōo ró jéē nacani ga rī jnūhun vāha Cristo nuū rō.

³⁰ Hermano jijnáhan ró, cáhán ndahú rí jín ró jeē chindéé ñáhán ró ruhū cacān tahu rō jehē rī nuū Yaā Dios siquī jniñu ndúcú ndéyí rí. Súcuan sáha ró síquī jeē candíje yó Jítóho yō Jesucristo, jín síquī jeē cundáhú ni yō jnáhan yó sáha máá Espíritu. ³¹ Te cacān tahu rō jeē na cácu rī nuū tée región Judea jeē tu cácandíje, jín jéē na cúsi ni tācá hermano ñuu Jerusalén jeē quíndēca rī xūhun yáha cuu de. ³² Te súcuan te núu cúní Yaā Dios te jecondēhe rí rohó jijnáhan ró, te cusí ni yō, te nanihín ni rī jeē condee rī jín ró. ³³ Te máá Yaā Dios jeē jéhe jnūhun ndeyí sí ni, na cóo ya jín ró jijnáhan ró. Amén.

Jeē cahán Pablo jeē sándeýí ni i

16

¹ Te vijna te cáhán rī jín ró jijnáhan ró jéē na chindéé ñáhán ró hermana Febe, chi cúu ña ñahan jéjníñu jeē siquí jnúhun ya nuū ñáyuu cácandíje ñuu Cencrea. ² Te cuatáhú ró ña nájnūhun cúní maá Jítóho yō, chi súcuan cánuú sáha hermano cácandíje. Te chindéé ñáhán ró ña na-ni vé cúu jeē jini ñúhún ña, chi súcuan ni chindéé ñáhán máá ña cuehē ñayuu, te suni nde ruhū.

³ Cahán rō jín Priscila jín Aquila jeē sándeýí ni ndindúú de, áchí rí, chi cáchindéé ñájnáhan de jín rí siquí jniñu Cristo Jesús. ⁴ Chi ná ni iyo jnūndóho jeē cuu rī nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuū ndindúú de, te nasūu máá-ni ruhū, chi suni tāca grupo ñayuu cácandíje tācá nación. ⁵ Te suni cahán rō jín ñáyuu cácandíje

ndútútú vehe de, sándeyí ni i, áchí rí. Te cahān rō jeē sándeyí ni Epeneto, tēe manī rī jīn. Chi ñuu Acaya, máa de cúu jeē ní candíje xīhna gā nuū Cristo. ⁶ Suni cahān rō jeē sándeyí ni María, ñahan jeē ní jejniñu ndasí jeē siquí jnúhun ya mēhñu ró jijnáhan ró. ⁷ Te cahān rō jeē sándeyí ni Andrónico jīn Junias, tēe cácuu jnáhan ñuu rī jeē ní cahīn jīn rí vecāa. Te tācá apóstol chi cájejnúhún de ndindúú tēe jíñá, te xīhna gā de ni cacandíje Cristo vēsú maá rí.

⁸ Cahān rō jeē sándeyí ni Amplias, tēe manī rī jīn, chi cándíje de Jitoho yō. ⁹ Te cahān rō jeē sándeyí ni Urbano, tēe chindéé ñájnañhan jīn yó siquí jniñu Cristo Jesús, te suni súcuan Estaquis, tēe jeē maní rī jīn. ¹⁰ Suni cahān rō jeē sándeyí ni Apeles, tēe jeē ni stéen jeē candíje vāha de Cristo, te suni súcuan cahān rō jīn ñáyuu vehe Aristóbulo. ¹¹ Cahān rō jeē sándeyí ni Herodión, tēe cúu jnáhan ñuu rī. Te suni súcuan ñáyuu vehe Narciso jeē cácaandíje maá Jítoho yō. ¹² Te suni cahān rō jeē sándeyí ni Trifena jīn Trifosa, ñahan cásajniñu siquí jnúhun máa Jítoho yō. Te suni sándeyí ni Pérsida, hermana jeē maní yō jīn, chi suni ni sájniñu ndasí ña siquí jnúhun Jítoho yō. ¹³ Te cahān rō jeē sándeyí ni Rufo, tēe cájejnúhún ñáyuu jeē vāha cándíje de máa Jítoho yō. Te suni súcuan cahān rō jīn náná de, te máa ña suni ni jito ña ruhū nájnuñhun jeē naná rī cúu ña. ¹⁴ Te cahān rō jeē sándeyí ni Asíncrito jīn Flegonte jīn Hermas jīn Patrobas jīn Hermes jīn táca hermano jeē cáyūcu jīn de. ¹⁵ Te suni súcuan Filólogo jīn Julia jīn Nereo jīn cuáha de, jīn Olimpas jīn ndihi hermano cácaandíje cáyūcu jīn de jíjnáhan de.

16 Te jeē cahán tāca ró jíin jnáhan ró, te yíñúhún techūhu ró ndaha i. Te tāca grupo ñayuu cácanđije nuū Cristo, cáhán i jeē na sándeýí ni rō.

17 Te cáhán ndahú rí jíin ró, hermano jijnáhan ró, jēē cóto ró máá ró nuū ñáyuu cútucu ni te ndúcú stívi jnáhan jíin jnúhun tu quíjnáhan jíin jēē ní cacutūhva ró. Te cujiyo ró núū i jíjnáhan i. 18 Chi ñayuu súcuan, tu jéjniñu i nuū Jítóho yō Jesucristo, chí máni ndíhví ni i síquī jeē cáji i. Te yōhoyo ndúxí i jíin jnúhun cácahān i, te súcuan stáhú i ñayuu jeē tu jíiní vāha. 19 Te máá ró jijnáhan ró, chí je cájini ndíhi ñayuu ndese vāha cájetáhú ró nuū yā, te jeē yúcuan cúsi ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. 20 Te máá Yaā Dios jeē jéhe jnúhun ndeyí sí ni, yachí sáha ya jeē cúndeýí ró síquī jexeén jeē cúu Satanás. Te ñúhun ni rī jeē Jítóho yō Jesucristo na sáha ya jeē vāha rōhó jíjnáhan ró.

21 Sándeyí ni rō jijnáhan ró, áchí Timoteo, tēe chíndéé ñáhán jíin rí síquī jnúhun ya. Te suni súcuan cácahān jnáhan ñuu rī Lucio jíin Jasón jíin Sosípater.

22 Te ruhū jeē naní Tercio, jeē tée rí carta yáha jēē cahán Pablo, suni cáhán rī jeē sándeyí ni rō jeē cácanđije ró Jítóho yō.

23 Te Gayo, tēe ni jéhe núu vehe ndéé rúhū Pablo, cáhán de jeē sándeyí ni rō jijnáhan ró. Te suni jéhe núu de vehe nuū tāca ñáyuu cácanđije. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

24 Te ñúhun ni rī jeē maá Jítóho yō Jesucristo, na sáha ya jeē vāha rōhó jíjnáhan ró. Amén.

Jnúhun sándíhi jēē cahán jeē yóhoyo cújéhnu ya

²⁵ Te vijna na cáhán yō jeē yóhoyo cújéhnú Yaā Dios. Chi máá yá cuu sáha jeē cuíñi nīhin ga rō jijnáhan ró jíin jnúhun jnáma ya rohó jeē nácani ri, jíin jnúhun Jesucristo jeē steén rī. Chi súcuan ni steén Yaā Dios jnúhun sáhi yá, jeē ní yisáhi ní cáni nde ná tu jecōo ñayīví. ²⁶ Te vijna te je ni nane cájí. Chi jíin tútu īi jeē ní catee tēe ni canacani jnúhun ya, ni jité núu jnúhun sáhi yáha nuū ñáyuu tácá nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

²⁷ Te ní cáni na cáhán yō jeē yóhoyo cújéhnú Yaā Dios siquī jniñu ní sáha ya jeē jíin Jesucristo. Chi máá ñn-ni ya iyó te yóhoyo ndíchí yá. Súcuan na cóo. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f